



10.10.2023

UKA2023/111

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunatsinni meeqqat angerlarsimaffiup avataanut inissiisarnermut atatillugu aningaasartuutit annertuumik annertusiartuinnartunut qanoq annikillisaasinnaanarluta, immikkut ilisimasallit suleqatigiissitaq piviusorsiortunik innersuussisussatut pilersinneqarnissaat anguniarlugu Naalackersuisut peqquneqassasut Inatsisartunut aalajangiiffigisassatut siunnersuut. Tamanna kommuunit angerlarsimaffiup avataanut inissiisarnernut aningaasartuutigisartagaannut annertusiartuinnartunut annikillisaanissaq siunertarlugu. Innersuussutit meeqqat inerikkiartornerannut, toqqissisimanerannut aammalu illersorneqarnerannut innarliissanngillat. Innersuussutit UKA 2024 nallertinnagu saqqummiunneqassapput.

(Inatsisartunut Ilaasortaq Bjørk Lange Olsen, Demokraatit)

Siumuminngaaniit siunnersuuteqartup Inatsisartuni ilaasortap Demokraatineersup Bjørk Lange Olsen-ip siunnersuutaa imaattumik oqaaseqarfigissavarput.

Siumuminngaaniit siunnersuuteqartoq qujaffigissavarput saqqummiusnaanik pingaaruteqartumut. Ukiorpasuarini nunatsinni meeqqanut ajornartorsiutit assigiinngitsorpasuarinik aallaveqartartut politikkeriulluta ilisimaarivarput. Ukiuni siuliunerusuni inuit pisinnaatitaaffiit pisussaaffiillu annikinnerisa nalaanni meeqqat atugarliortut suumiginngaasut ersittumik takusaasarsimaqaat. Ukiuni kingulliunerusuni pissutsit allanngornerisa nalaanni meeqqat pisinnaatitaaffii atuutilernerisa kingunerisaanik kiisalu aamma inuit pisinnaatitaallutik pisussaaffeqarnerisa aammalu sakkortusisamik pisussaaffiit atuutilernerisigut meeqqanut ajornartorsiorsinnaasunik imaluunniit ernumassuteqarluni nalunaartussaanerup sakkortusineratigut malunnarpoq meeqqanut suliassat annersusinikuusut.

Tamanna aamma soorunalimi aningaasatigut malitseqarpoq. Meeqqat illersugaanerisa takussuteqalernerat siumuminngaaniit alloriarneq pitsaasutut isigivarput qujassutigalugu.

Siumuminngaaniit ilisimaarivarput suulluunniit qullersanit inatsisitigut pissutsit nutaat atuutileraangata innuttaasut aningaasaqarnerisigut piffissami sivisusinnaasumik kinguneqarsinnaasartut. Tamannalu aamma soorlu siunnersuuteqartup Inatsisartunut Ilaasortaq Bjørk Lange Olsen, Demokraatineersup aningaasartaanik taakkartuineratigut qaffakkiartortoq piffinni aalajangersimasunik allakkiaani takuneqarsinnaasoq.



Siumuminngaaniit ilisimaarilluinnarparput meeqqat angajoqqaamininngaaniit peersitaagaangamik soorlu sumiginnaarujussuarnerup kingunerisaanik amerlanerit tarnimikkut ikilerneqarnertik anniaatigisaqigaat. Taamatut pisoqaraangat ajoraluartumik meeqqat ilaasa anniaatigilluinnarlugu inuunerminnik nammatariuartapaat. Meeqqanut ikiunerup siunertariuaannartussaavaa meeqqap pitsaasumik toqqissisimanartumik inuttut alloriaqqinnissaanut aqquisioneqarluni inooqqinnissaanut aqquisioneqarnissaa. Taamaammat siumuminngaaniit inuit angajoqqaarsiatut sulisimasut suliffeqarfiillu meeqqanik paaqqinnillutik perorsaasimasut meeqqanillu pisinnaatitaaffiimik ilungersorlutik illersuiniarlutik suliaqarsimasut pitsaasumillu alloriartitseqataasimasut uummammik qujassutissaqarfigaagut, tamanna ataqqaanaatigaarsi.

Siumup anguniarpaa meeqqat angerlarsimaffiup avataanut inissinneqartartut ikilisarneqarnissaat. Siumup sulissutiguassavaa Ilaqutariit avissaartinnagit ataatsimoorluni ikiorserneqarfiusinnaasumik sakkussanillu aallerfiusinnaasunik pilersitsinissaq. Siumup pingaartitaraa ilaqutariit nukittuut peqqissullu pilersinneqarnissaat.

Ilaqutariit tunngavissinneqassapput meeqqat inuunerminni aallartilluarsinnaaqqullugit, tamanna piviusunngortinneqassaaq Inatsisartut, Naalackersuisut, kommunit, kattuffiit, angajoqqaat susassaqtullu allat tamaasa suleqatigiinnerisigut.

Angajoqqaat meeqqamik atugarisaannut akisussaanerpaapput. Angajoqqaat perorsaanikkut sumiginnaasarnerat pillugu periusissiamik nutaamik suliaqartitsinissaq, peqatigiilluta ajornartorsiutip qaangerneqarnissaata suleqatigiissutiginnissaa kinguarsarneqaaqqissinnaanngitsoq Siumut isumaqarpoq.

Peqatigisaanik ilaqutariinnik ataatsimoortitsilluni sullissineq nukittorsarneqassaaq, ilaatigut ilaqutariinnut højskolertitsisarnerit nutaamik annertusarlugit ingerlatiinnarneqarnerisigut piorsaaffiginerisigullu.

Ilaqutariit siunnersorneqarnissamik pisariaqartitsisut piaartumik ikiorneqartarnissaat Siumup aqquutissiuutissavaa, taamaasiornikkut meeqqanik angerlarsimaffiup avataanut inissiisarneq aamma annikillisarneqarsinnaaqqullugu.

Ilaqutariit siunnersorneqartarnerat pitsaanagerusunngorlugu ingerlaqqittariaqarpoq, tamatumunnga naammattunik ukiut tamaasa aningaasaliisoqartarnissaa qulakkeersimajuartariaqarpoq.

Siumumiit naalackersuisut pilersaarummik suliaat imaattoq “ilaqutariinni pitsaaliuineramik suliaqarnermut iliuusissatut pilersaarut 2022-2030”

Taannalu 50-nik qupperneqarpoq. Nunatsinni pissutsit meeqqat angerlarsimaffiup avataanut inissinneqarsimasut qanoq amerlatigut taakkartoriarlugit Naalagaaffiit Peqatigiit Meeqqat Pisinnaatitaaffii Pillugit Isumaqtigiissutaasa artikelit assigiinngitsut saqqummeriarlugit, tassanngaaniit pilersaarutaasut anguniagassat assigiinngitsut suleqatigiiffiqeqarlutik



akisussaasuusut assigiinngitsut aqputigineqarlutik eqqaaneqarput. Taamatut naalakkersuisut suliaqarsimanerat siumumiit nuannaarutigeqaarput. Siumumiillu qularutiginnigilluinnarparput anguniagassatut pilersaarutaasut tamatta inatsisartut, naalakkersuisut, kommunit, kattuffiit, angajoqqaat susassaqtullu allat suleqatigiiffigalugit ilaqtariittut pitsaanerpaaq anguniarlugu ineriartoqatigiiffigiumaaripput. Sulimi meeqqanik angerlarsimaffiup avataanut inissinneqartussanik utaqqisoqarmat, aammalu qularnanngitsumik pissutsit taamaattut nunatsinni nalaatagut atuuttussaannguatsiarmata ukuini aggersuni.

Taamatut siumumiit oqaaseqarluta siunnersuuteqartumut paasinnilluta naalakkersuisut allannguutissatut siunnersuutaanut paasinnilluta ilaqtariinnut peqqissutsimullu ataatsimiititaliamut ingerlateqqipparput. Neriuutigilluinnarlugulu ataatsimiititaliami suleqatigilluarumaartut.

Mala Høy Kúko

Siumut